



03 JUL, 2026

Loji jana kuasa ditutup jadi hab TBB

Berita Harian, Malaysia



Fadillah menerima laporan daripada Ketua Projek Serantau Asia Pasifik Forum Ekonomi Dunia, Sandy Chong (dua dari kiri) pada majlis penutup Forum Ekonomi Dunia 'Malaysia's Energy Future: Power Sector Decarbonisation Deep Dive' di Kuala Lumpur, semalam.
 (Foto BERNAMA)

Loji jana kuasa ditutup jadi hab TBB

Malaysia merancang untuk menggunakan semula tapak loji jana kuasa arang batu yang akan ditamatkan operasi kepada hab tenaga boleh baharu (TBB) dan kemudahan penyimpanan tenaga bateri di bawah Rangka Kerja Penggunaan Semula Tapak Arang Batu Kebangsaan yang dicadangkan.

Timbalan Perdana Menteri dan Menteri Peralihan Tenaga dan Transformasi Air, Datuk Seri Fadillah Yusof, berkata loji arang batu sedia ada di negara ini adalah infrastruktur nasional penting, termasuk sambungan rangkaian penghantaran elektrik, kemudahan industri serta tanah di lokasi yang strategik.

"Daripada membiarkan aset ini terbengkalai, kita perlu melihatnya sebagai peluang untuk mewujudkan nilai ekonomi baharu.

"Tapak yang dikenal pasti berpotensi kukuh untuk ditukar menjadi hab TBB, kemudahan penyimpanan tenaga bateri serta

pembangunan tenaga bersih lain yang terus menyumbang kepada ekonomi tempatan dan pada masa sama menyokong objektif peralihan tenaga negara," katanya ketika berucap pada majlis penutup Forum Ekonomi Dunia 'Malaysia's Energy Future: Power Sector Decarbonisation Deep Dive' di Kuala Lumpur, semalam.

Menurutnya, kerangka cadangan itu, yang digariskan dalam kertas pandangan dasar Forum Ekonomi Dunia bertajuk 'Beyond Coal: Building a Flexible, Resilient and Clean Power System for Malaysia', akan menjadi asas kepada libat urus berterusan antara kerajaan, pengawal selia, utiliti, pelabur dan masyarakat setempat.

Beliau berkata, setiap loji jana kuasa yang ditamatkan operasi membuka peluang untuk mewujudkan industri baharu, menarik pelaburan serta menyediakan tenaga kerja bagi ekonomi masa hadapan.

Fadillah berkata, Malaysia kekal komited terhadap sasaran-

nya untuk tidak membina loji jana kuasa arang batu baharu, beralih sepenuhnya daripada penjaan elektrik berasaskan arang batu menjelang 2044 serta mencapai 70 peratus kapasiti TBB terpasang menjelang 2050.

Beliau berkata, penggunaan TBB perlu dilaksanakan lebih awal daripada penutupan loji arang batu.

"Ini perkara penting yang perlu diberikan tumpuan. Jika penggunaan TBB tidak berkembang dengan cepat, terdapat risiko bahawa pergantungan kepada arang batu akan diganti dengan pergantungan yang lebih tinggi kepada gas asli cecair yang diimport.

"Keadaan ini sekali gus mendedahkan Malaysia kepada ketidakpastian harga bahan api dan ketidakpastian geopolitik luaran. Peralihan yang berjaya perlu mengurangkan kebergantungan, bukan sekadar mengubahnya daripada satu bahan api import kepada bahan api import yang lain," katanya. **BERNAMA**